

Pa aki 6 luna e lo mester ta cla pa lansa

Partido di Booshi lo ta un mix di hende hoben y hende experiencia

ORANJESTAD – Tur cos ta musta cu den e proximo 6 lunanan, lo tin un structura formal pa e partido politico di parlamentario independiente Booshi Wever.

Esaki Wever a confirma na BONDIA ARUBA, aunke e mes ta bisa cu e no kier pa tempo ta un factor determinante pa esaki. Pues cu e no kier presion di tempo pa por forma su partido politico pero ta confirma cu su partido lo bira e partido pa tene cuenta cune.

E partido ta hayando structura y Wever kier a solamente confirma cu lo tin tanto politiconan 'veterano' y politiconan nobo hoben, cu mes momento mester bai lidera e partido. Pues mientars cu tin hendenan experiencia cu lo forma parti di e partido, e idea ta pa e hobenan lidera esaki y tuma e timon di e partido. No ta conoci si Wever mes lo lidera su partido unabes cu esaki ta conoci.

Tabata na BONDIA ARUBA mes cu Wever a indica den forma di primicia cu e la didi cu e ta lanta su propio partido y cu su decision a keda fiha riba e proceso aki. Tabata na final di aña pasa cu e la vocifera esaki y tabatin planea pa e aña aki participa mas informacion concreto riba e asunto aki. E siman aki BONDIA

ARUBA a confronta e parlamentario cu e asunto aki y e la confirma cu ta trahando duro riba esaki.

E siman aki Wever a confirma cu ta trahando duro riba e partido aki y posiblemente prome cu e prome parti di aña 2012 ta tras di lomba, lo conoce e structura di e partido, e nomber y posiblemente mas detalles di e partido aki.

Tin hopi anticipacion pa cu e partido aki, mirando cu tur cos ta cana riba e reputacion di Wever pa cu e proximo eleccion.

Wever a wordo semper considera como un fuerte den politica y den partido MEP.

Considera semper como un vote getter importante, awor tin cu bai mira si esaki ta traduci automaticamente na un cantidad di voto tambe pa e partido di Wever y cu si e ta logra mantene e popularidad di su votadornan of si esaki ta cai awor cu e no ta mas cu MEP.

Den comentarionan anterior ora cu Wever a bandona e partido anja pasa, e ex lider Nelson Oduber a bisa cu e votonan cu esnan cu a bandona MEP a haya, ta danki na MEP y ta votonan di MEP. Como tal e



Parlamentario independiente Booshi Wever

personanan por a wel bandona e partido, pero e votonan ta keda pa MEP. Pues no mester kere cu awor cu e miembronan a bandona

e partido, esaki ta nifica cu e votonan tambe ta bai cu e miembro ey.

Un forma pa midi esaki ta ora cu Wever lanta su parti-

do, y bira conoci ken esnan ta cu lo forma parti di e partido aki. Tambe ki structura e partido aki lo tin mirando e pensamiento di Wever pa cu politica, MEP y tambe porta mas importante, su filosofia politico pa cu defunto Betico Croes.

Mester bisa cu Wever tin un siguransa fuerte di su hendenan rond di dje cu ta sigure cu nan ta keda cune y cu e ta fuerte para pa un partido nobo y cu su 'achterban' ta cla pa apoye asina cu e lanta su partido.

Tempo lo bisa kico lo por bira di e partido aki. Otro persona cu tambe ta pensando pa bin cu su propio partido ta ex colega di ex partido Marisol Lopez Tromp, aunke e no a divulga nada nada ainda, compara cu Wever cu si a laga los caba y confirma cu e ta bin cu un partido nobo. □